



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

29. Kalenderwoche – ab 19. Juli 2009

Angähm is in!

Manschma du isch denkn... also, eischendlich du isch ja sogahr sähr ofd denkn – so midm Kobb!
So ibor alles Meeschliche, ibor Godd un de Weld, wie mor so sachn dud. Abor manschma du isch
denkn, dass isch nisch rischdisch denkn du. Ährlisch. Mir dud das manschma so vorkomm, als wie
wenn alle annorn annersch denkn dun, als wie isch.

Wobei mor nadierhlich nie weeß, ob annre werglich denkn odor ob die bloß ihr Maul offmachn
un das ablassn dun, was dähn Weesch zum Hindorn nisch gefundn had. Nee, was mansche so
ablassn, dageeschn is CehOhZwei e Glimavorbesserer!

Abor nu kommd ehm ooch widdor dähr Bunkd, wo isch misch frachn du, ob isch womeeschlich
dor Eenzsche bin, dähr das merkn dud? Was mansche – ooch im Fernsähor – ungeschdrafd an
Bleedsinn ablassn derfn... un die grischn dann noch Geld dafiehr!

Na, scheen – isch kann das nisch ändorn. Abor wundorn darf mor sisch schon ma driebor.

Un isch bin grade widdor ma dodahl am Wundorn - nähmlisch, was die Immidsch-Gambansche bei
uns in Gemnidz bedreffn dud. Na, Sie wissen schon – das mid dähm D-Schird – wo droffschdehn
dad „Chmeindz“. Da hamm sisch also fasd alle driebor offgereeshd, wie dähmlisch das is –
Chmeindz! Schon, weil das so bißl nach Mainz kling däde. Abor das had nu das Word „meins“ odor
„mein“ von Naduhr hähr an sisch, dasses e bißl wie Mainz odor wie Main, was dor zugeheerische
Fluss is, kling dud. Wobei nadiehrlich Mainz nisch am Main lieschd, sondorn am Rhein.

Jednfalls – isch bin dähr gewähsn, dähr das luschdisch gefundn had – Chmeindz! Un ooch ährlisch!

Isch habb mir so e Hemde gekoofd. Abor nu hamm annre sisch annre D-Schirds ausgedachd. Als Geeschnendwurf sozusachn. Un de Leide hamm driebor abgeschdimmd, welsches nu das Besde is. Un da ham die e D-Schird gewähld, wo e Lehwe droff is - un undn drunnor schdehd:
„Lehwenschdarges Chemnidz“

E Lehwe! Wo had denne Chemnidz schon ma was mid eim Lehwe zu dun gehabbd? Ma abgesähn dadervon, dass im Schdadtwabbn eenor is. Abor e Lehwe im Schdadtwabbn, das is nu so seldn, wie Schbadzn an dor Bradwurschdbude.

Nee, mid dähm D-Schird da leefsde dann Wärbung fiehr Minschnor Lehwenbräu! Odor fiehr de Minschnor Lehwen, was dähr Fußballglub is. Un wieso is Chemnidz eischendlich lehwenschdarg? Das is doch eene gladde Ibordreibung, Angähborei! Solsche Angähborei dun se in dor Wärbung machen - mir sinn de Scheensdn, mir sinn de Schdäragsdn, mir sinn de Greeßdn!

Dud mir eschd leid – Chemnidz is meins, weils ehm meins is, ooch wennis nisch so scheen un groß un schdarg is... - das find isch viel bescheidnor als wie „lehwenschdarges Chemnidz“ So eene Angähborei!... - nee, de Leide dun wahrscheinlich doch annersch denkn als wie isch. Die wolln so eene Angähborei! Die wolln mid geblähdor Brusd rumloofn! Isch nisch!

Eduard Sachsenmeyer